

Datum: 06.10. 2023.

Broj: 02-06-1055

TI BiH uputio inicijativu Vladi i Parlamentu FBiH za donošenje dva važna antikorupcijska zakona iz 14 prioriteta

Sarajevo, 06. oktobar 2023. godine - Transparency International u BiH (TI BiH) uputio je zvaničnu inicijativu Predstavničkom domu Parlamenta Federacije BiH za donošenje novog Zakona o sprečavanju sukoba interesa kao i Zakona o zaštiti prijavitelaca korupcije a prema poslovniku ovaj dom se mora izjasniti o inicijativi u narednih 30 dana. Takođe TI BiH je uputio i ponovljenu inicijativu u kabinet premijera FBiH Nermina Nikšića jer se radi se o dva važna antikorupcijska zakona iz 14 prioriteta EU koje je Vlada FBiH povukla iz procedure još u maju ove godine i nikada ih nije ponovo uputila u Parlament.

TI BiH je još tada upozorio da su ovi zakoni prošli određene procedure i usaglašavanja i da će se izgubiti značajno vrijeme koje će brojni funkcioneri iskoristiti da i dalje nesmetano budu u sukobu interesa, obavljaju višestruke funkcije i dodjeljuju javni novac i poslove sopstvenim privatnim preduzećima i udruženjima. Neusvajanje ovih zakona kao i brojna imenovanja koje je nedavno izvršila Vlada FBiH gdje su osobe koje su direktno u sukobu interesa postavljene na značajne funkcije, suprotna su deklarativnom opredjeljenju ove Vlade za ispunjavanje uslova iz 14 prioriteta. To je posebno otvoreno izraženo u slučaju imenovanja sina ministra unutrašnjih poslova FBiH Rame Isaka za direktora javne ustanove, kao i kod dodjele važnih poslova porodičnoj firmi ovog ministra od strane pojedinih javnih preduzeća. Ovakvi potezi pokazali su da vlast očigledno nema namjeru da u skorije vrijeme adekvatno reguliše ovo oblasti pa TI BiH očekuje da o svemu čuje zvanično obrazloženje.

Takođe treba podsjetiti da se navršava punih 10 godina kako u ovom entitetu ne postoji nadležno tijelo kojem se mogu prijaviti slučajevi sukoba interesa a da brojne institucije potpuno ignorišu postojanje ovog zakona prilikom imenovanja ili dodjele budžetskih sredstva organizacijama i privatnim firmama koje vode javni funkcioneri. Prema posljednjim podacima TI BiH, 241 funkcioner u FBiH obavlja više od jedne funkcije u javnim preduzećima i javnim ustanovama a brojni imaju i dodatne angažmane u neprofitnim organizacijama koje se finansiraju iz budžeta.

U inicijativi koja je upućena Vladi i Parlamentu, TI BiH podsjeća da je Federacija BiH jedini nivo vlasti koji nije zakonski zaštitio prijaviocima korupcije i da zaposlenici javnog sektora koji se odluče da prijave i nepravilnosti dalje nemaju institucionalnu zaštitu. Na kraju, imajući u vidu opredjeljenje nove vlasti u FBiH za ispunjavanje uslova iz 14 prioriteta od kojih se veliki dio obaveza odnosi na entiteta a ne samo na državni nivo, TI BiH još jednom apeluje na usvajanje ovih važnih zakona koji su ključni za vladavinu prava i borbu protiv korupcije.